



DEPUTACIÓN PROVINCIAL
OURENSE

SECRETARÍA

**FRANCISCO CACHARRO GOSENDE, SECRETARIO XERAL DA
DEPUTACIÓN PROVINCIAL DE OURENSE**

C E R T I F I C O: que o Pleno da Corporación Provincial, na sesión ordinaria do día **29 de xuño de 2012**, adoptou o seguinte acordo:

**CONVENIO MARCO PARA ASISTENCIA ÓS CONCELLOS NA XESTIÓN
DAS SÚAS REDES DE ESTRADAS.-**

Non se producen intervencións e a Presidencia somete a votación o ditame favorable da comisión informativa de Plans, Vías e Obras e Cooperación, e co voto favorable dos deputados do Grupo Popular (14) e do Grupo Socialista (8) e a abstención dos deputados do BNG (2), o Pleno adopta o seguinte acordo:

1º) Aproba-lo convenio marco de cooperación e asistencia ós concellos para a xestión das redes municipais de estradas, co seguinte contido:

Primeiro.- Obxecto, contido e condicións.

1. Constitúe o obxecto do presente convenio marco a regulación das condicións xerais para a prestación, pola Deputación Provincial de Ourense, de cooperación e asistencia ós concellos da provincia para a xestión das competencias en materia de defensa das redes municipais de estradas, mediante a delegación á Deputación do exercicio das competencias municipais correspondentes.

En virtude do presente convenio, os concellos adheridos delegan na Deputación Provincial o exercicio das seguintes competencias, referidas ás estradas de titularidade municipal:

- a) A incoación, tramitación e resolución dos expedientes de reclamación polos danos sufridos nas estradas (no de caso afección ás estradas por terceiro)
- b) A incoación, tramitación e resolución dos expedientes sancionadores (nos casos de infraccións administrativas en materia de uso das estradas e as súas zonas de servidume e afección)
- c) A incoación, tramitación e resolución dos expedientes de restitución do medio físico no caso de danos causados ás estradas por terceiros.



d) A execución subsidiaria das ordes de reposición ou reparación do medio físico das estradas danado por terceiros, execución que pode levarse a cabo por administración mediante as brigadas de Vías e Obras da Deputación.

A delegación conferida abrangue a das facultades precisas para xestionar, na súa integridade, os procedementos administrativos correspondentes, incluíndo a resolución dos recursos en vía administrativa, a xestión integral dos procedementos de execución forzosa e o exercicio das accións xudiciais relacionadas co obxecto dos ditos procedementos.

2. O exercicio delegado das competencias municipais indicadas non terá ningún custo para os concellos adheridos. Non obstante, en virtude da dita delegación, o produto das multas e sancións impostas pola administración provincial, así como as cantidades ingresadas en concepto de indemnización por danos ás estradas e polos custos da restitución do medio físico e as multas coercitivas que poidan impoñerse nos procedementos de execución forzosa constituirán un ingreso propio da facenda provincial. Na parte non cuberta polos ditos recursos, o custo do exercicio das competencias delegadas será financiado con cargo ós fondos propios da administración provincial.

3. A efectividade da delegación queda condicionada a que por parte do concello adherido se designe unha persoa responsable, con coñecementos suficientes da rede viaria municipal, que actuará como interlocutor coa Deputación, así como a que se subministre ó Servizo de Vías e Obras da Deputación a cartografía do termo municipal da que se dispoña.

4. A Deputación Provincial comunicaralle periodicamente ó concello os expedientes tramitados, dos que en todo caso se lle remitirá copia á administración municipal unha vez concluída a súa tramitación.

2ª) Procedemento de adhesión ó convenio

Para a adhesión ó convenio, as entidades locais interesadas remitiranlle á Deputación Provincial o acto administrativo de adhesión, adoptado polo Pleno do concello. Para estes efectos, a Presidencia da Deputación poderá aprobar un modelo normalizado de acordo de adhesión.

A adhesión ó convenio será eficaz a partir do mes seguinte ó da data de entrada do documento de adhesión no rexistro xeral da Deputación, sen prexuízo do establecido no apartado 3 da cláusula anterior.



3ª) Comisión de seguimento

Establécese unha comisión de seguimento do convenio con cada entidade asinante, que estará integrada polo xefe do Servizo de Vías e Obras e un representante designado pola entidade local interesada. Actuará como secretario da comisión o secretario xeral da Deputación ou funcionario que legalmente o substitúa, coas funcións propias dun secretario de órgano colexiado conforme co establecido no Título II da Lei do réxime xurídico das administracións públicas e do procedemento administrativo común.

A comisión de seguimento reunirse a pedimento de calquera das partes integrantes, e as súas funcións serán as de seguimento da aplicación do convenio, interpretación e resolución de incidencias. No caso de non acadarse un acordo no seo da comisión, a Deputación Provincial resolverá unilateralmente e con carácter executivo o que proceda, sen prexuízo da posibilidade de impugnación deste acto administrativo pola entidade local interesada conforme co sistema de recursos vixente no noso ordenamento xurídico.

4ª) Vixencia

O presente convenio terá vixencia indefinida para cada concello adherido dende a data de efectividade da adhesión, en tanto non se proceda á súa extinción conforme co establecido na cláusula seguinte.

5ª) Extinción do convenio

O presente convenio extinguirase por denuncia unilateral dos concellos adheridos ou por incumprimento de obrigas convencionais esenciais. En ámbolos dous casos, a entidade interesada comunicará, cunha antelación mínima dun mes á súa data de efectividade, a súa decisión de resolve-lo convenio, que será executiva sen prexuízo da posibilidade da súa impugnación pola outra parte.

A liquidación dos convenios resoltos anticipadamente corresponderalle, en todo caso, á Deputación Provincial, mediante resolución da Presidencia adoptada trala audiencia previa da outra parte. Esta resolución será executiva, sen prexuízo da posibilidade da súa impugnación conforme co sistema de recursos legalmente aplicable.

Nos supostos de resolución unilateral anticipada do convenio por causa non imputable á Deputación, a liquidación incluírá unha relación dos gastos sufridos pola Deputación, debidamente xustificadas no expediente.



DEPUTACIÓN PROVINCIAL
OURENSE

SECRETARÍA

6ª) Natureza e réxime xurídico

O presente convenio terá natureza administrativa, correspondéndolle á xurisdición contencioso - administrativa a resolución das controversias sobre a súa validez, eficacia, efectos e extinción.

2º.- Ordena-la publicación do presente convenio no BOP para xeral coñecemento, e notificárlle-lo ós concellos da provincia, para os efectos de que procedan á súa adhesión.

E para que conste, -nos termos do artigo 206 do vixente ROF-, expido este certificado en Ourense, o vinte e nove de xuño de dous mil doce.

V. e pr.

O PRESIDENTE,



DEPUTACIÓN PROVINCIAL
OURENSE

PRESIDENCIA

S-1

(FCG/af)

Remítolle copia de certificación do acordo que adoptou o Pleno da Corporación Provincial, na sesión do 29 de xuño de 2012, aprobando un convenio marco de cooperación e asistencia ós concellos para a xestión das redes municipais de estradas, invitando a esa entidade local para que se adhira ó mencionado convenio marco.

Remítese, así mesmo, copia do Decreto da Presidencia no que se aproba un modelo da parte dispositiva do acordo que deben adopta-los concellos que se queiran adherir ó convenio.

Para calquera dúbida ou aclaración, poden dirixirse a esta Deputación Provincial contactando co Servizo de Vías e Obras, teléfono 988.385.147, e-mail jose.manuel.gonzalez.sanchez@depourense.es

Ourense, 3 de xullo de 2012

O PRESIDENTE,

